

**Dissertatio academica, mundum invisibilem, breviter delineatura ... /  
modernate ... C. von Linné.**

**Contributors**

Roos, Johan Carl, 1745-1828.  
Linné, Carl von, 1707-1778.  
Uppsala universitet.

**Publication/Creation**

Upsaliae : [publisher not identified], [1767]

**Persistent URL**

<https://wellcomecollection.org/works/b94s5tsc>

**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>

F. D. G.

DISSE<sup>22</sup>RAT<sup>T</sup>O ACADEMICA,

# MUNDUM INVISIBILEM,

BREVITER DELINEATURA,

QUAM,

CONS. NOB. ET EXPERIENT. FAC. MED.  
IN ILLUSTRI AD SALAM LYCEO.

MODERANTE

VIRO NOBILISSIMO atque GENEROSO

DN:O CAROLO

VON LINNÉ,

EQUITE AURATO DE STELLA POLARI,

S:Æ R:Æ M:TIS SUEC. ARCHIATRO,

MED. ET BOTAN. PROFESSORE REG. ET ORD.

ACAD. SCIENT. PARIS. PETROPOL. UPSAL. HOLM. BEROL. IMP.

N. C. LOND. ANGL. MONSP. TOLOS. FLORENT.

EDINB. BERN. NIDROS. SOCIO.

CURIOSORUM SUBMITTIT CENSURÆ

JOHANNES CAROLUS  
ROOS,

HOLMENSIS.

IN AUDITORIO CAROLINO MAJORI  
DIE VI. MARTII ANNI MDCCCLXVII.

HORIS ANTE MERIDIEM SOLITIS

W W W \* W W W  
UP SALIÆ.



CAP. I.  
§. I.

**H**omo ideo creatus est, ut divini operis rerum  
creatarum contemplator existeret, & dum  
admiraretur creaturam, ejus creatorem et-  
jam agnosceret. Fuit hoc olim effatum doctissimi Raji,  
quod meam potissimum acuit attentionem, ut omni ni-  
su naturam scrutari cupiam. Est enim hæc obligatio  
naturalis ubique utilissima, & multa miraculorum varie-  
tate eximiam adfert delectationem, sine qua mera ubique  
solitudo. Insecta igitur collegi non invitus, atque in his  
animalculis minimis summa Præpotentis vidi miracula  
Creatoris, qui nihil frustra fecit, nihil sine fine atque usu  
condidit. Haud ita pridem Nob. Dom. Præses seminibus  
Fungorum quorundam examinandis occupatus, ostendebat  
mihi luculentissime moveri hæc & cursitare in aquis in-  
star piscium, vere viva animalcula, quæ postmodum, (le-  
ge naturæ hucusque inaudita & intellectum hominis  
omnem superante, ut fieri non posse dicerent multi, nisi  
videre oculis & palpare manibus rem liceret) muta &  
fixa futura erant Fungorum corpora. Hoc mihi, speci-  
men

men Academicum primum edituro, occasionem dedit eximios scientiarum naturalium in praesenti seculo cogitandi progressus, per attentionem ad minimas res naturales, quas despexit antiquior aetas & quae in oculos vulgi non incurunt, cum tamen minima haec non minus notata digna, admiranda & necessaria sint, quam quae sunt maxima. Primum nobis in hanc lucem editis corpora maxima & amplissima sese offerunt contemplanda, unde etiam Alisquis historiam suam naturalem Equis & Canibus describendis ordiri voluit, utpote quae animalia primum fere nobis innotescunt. Indocti ad Indias iter facientes, in diariis suis atque itinerariis maximos Elephantos, Rhinocerotes, Camelos, Crocodylos, Cetos, etjam proceras Palmas, Bombaces, Averhoas, Cedrelas, cetera, vix omittunt, ad Muscos vero minutos, ad Algas, Acaros, Hydras & similes, non minori, quam crassiora ista, attentione dignas, rarius convertunt oculos. Attentionem igitur Commilitonum ad minima corpora naturalia, seu quae *vulgus non observat* aut existere novit, excitare constitui, atque illa velut MUNDUM INVISIBILEM in visibili concipio, ea tantum complectentem corpuscula, quae *oculis armatis* seu per microscopia conspici possunt. Atque hujus tractationis duo erunt capita.

I De Notioribus, sed nuper detectis.

II De Obscurioribus, futurorum post hac hominum industriae committendis, quos ad attendendum acuere, potissimum est mibi in votis.

## §. II.

MICROSCOPIA ab antiquis usque temporibus sati nota, in corporibus minimis propioribus examinandis eundem nobis praestiterunt usum, quem in majoribus atque procul existentibus corporibus Cœlestibus considerandis Telescopia præbuerunt Astronomis. Emendata subin-

de sunt Microscopia & amplificata, ut majorem adhibita lucem adferre queant. Qua in re Liberkūnius, ut alios taceam, immortale nomen sibi peperit. Pervestigata, seculis præterlapsis, a Gesnero, Aldrovando, Willoughbæo, Rajo Zoologia, & pertractata a Lobelio, Dodonæo, Clusio, utroque Bauhino, Tournefortio, Rajo ceterisque Scientia Botanica, pleraque, saltem in Europa, detesta & pensitata crederes in scientia naturæ. Sed ostendit nobis hoc Seculum duplo fere plura naturæ prodigia, quam antiquior viderat ætas, quod patet evolventi *Plumieri*, *Brownii*, *Jacquini*, *Burmanni*, *Rheedi*, *Rumphii* & plantas; *Edwardsi*, *Brissoni* Aves; *Reaumurii*, *Ræselii* Insecta; *Rumphii*, *Bonnanni*, *Listeri*, *Argenvilli* Conehilia; *Eliji* Sertularias, ut reliqua taceam. *Museum* naturæ velut Palatium mihi occurrit, concamerationes habens longe plurimas, & stupendis Creatoris artificiis & miraculis impletas, quibus secundum singula genera Iuus sit locus attributus; ad maxima Naturæ amphitheatra primus cuivis patet aditus, alii vero saepè sunt clausi; arte heic opus est ad januam cameræ cujusdam paulatim aperiendam, ubi novus quasi intus oculis lèse offert orbis. Apertis per *Gesnerum* foribus fructificationis, præter spem inventum est Filum Ariadnæum totius BOTANICES. Qui primum *Succinoterendo* januam aperuit cameræ ELECTRICITATIS, inclusam heic nequaquam putabat integrum scientiam, quæ jam curiosis omnibus est in deliciis. Nemo credidisset flores aliquot monstrosos referare posse cameram PROLEPSEOS plantarum, quæ posteritati multum facesset negotii, aut *Aconitum* apertum conclave PANIS EUROPAEI. Præcipuam tamen clavem ad seras hujus Palatii, per omnia secula clausi, recludendas præbuerunt Microscopia. MUSCI quidem ab Anglis, Rajo ejusque amicis coætaneis erant investigati, sed non satis tamen perspecti, usque dum *Dillenius* ex professo Muscos & Lichenes.

indagandos, detegendos, describendos, delineandos & denominandos suscepit, qui solus ingentem plus quam sexcentarum specierum produxit exercitum. Sed sic non omnes nudis oculis cerni ac determinari queunt; heic igitur microscopia, tam ad descriptionem, quam figuram, prorsus erant necessaria, quibus adeo jam tandem sunt in aprico positi, ut facile omnino cognoscantur ususque eorum in arte Tinctoria, Medicina, re Cibaria, Aedificiis, stramentis, Horticultura, maxime vero in Oeconomia Naturæ dudum pateant, adeo ut infelicissima foret regio Muscis destituta. Hinc nemo sapiens ulterius dicere audebit, nihil agere, bonoque otio abuti illos, qui muscos & muscas legendo, opera Creatoris admiranda contemplantur, inque usus debitos convertere docent.

### §. III.

*Trembleus* microscopio in aquis videbat animalculum velut punctum mucosum nudis oculis impervium; observabat illud sua extendere tentacula quibus alimenta colligeret; videbat eadem tentacula ope forficulae sublata, recrescere, ipsum hoc corpusculum forfice dissectum, bina constituere animalcula. Simplex hoc experimentum anno 1739 januam referavit camerae POLYPORUM, quæ attentos & curiosos maximis delegavit miraculis. Vix hoc detectum, dum immortalis *Renumurio*, Galliæ decori, plenum facesserit negotium; magnus ille Botanicus Bernb. *Fussicus* ad oras Normandiæ & acutissimus *Gvettardus* ad oras Piætoniæ hanc ob causam sunt protecti. *Baker*, *Ellis*, *Baster*, *Ræsel*, *Ledermyller*, *Schæffer* & alii plures campum heic suam microscopiis exercendi attentionem atque industriam, invenerunt patentissimum. Multa heic *Hydræ*, *Vorticellæ* & alia vermium genera, quæ antea nemo noverat, fuerunt detecta. Inventa sunt hæc in omnifere aqua, vel oculis non videnda, vel instar puncti minu-

tissimi mucosi; sed microscopiis conspiciebantur esse animalcula saepius composita, ramis, more plantarum, instruta, quorum singuli integra totidem sunt animalia. Observatum est dividiri illa posse, ut ex quovis ejusmodi simplici animali vel ramo, plura fierent, atque tentaculo forfice demto, aliud statim corpus instrui, separatum vero brachiolum in totum denuo abire Animal. Visa sunt haec corpora ramis aut gemmis, quemadmodum vegetabilia, augeri, quin etiam divisum inferi, ut corporis dissesti dimidium cum alio junctum, in totum concresceret animalculum: Unicum in simplicibus his corporibus inventum est ostiolum, oris simul & ani vicem suppleturum, adeo ut deglutita quaedam, ipsis saepe majora, succo prius extracto, per eandem, qua adsumta fuerint, aperturam redderent. Illud vero omnem Physiologiae ideam superat, quod Polybus, extrorsum atque introrsum contortus & inversus, nihilo minus vivit ac nutritur, ut antea; ut taceam haec animalcula in rivis, aqua aestivo tempore arescente, exsiccati atque adeo mori; pluvia autem adfluente reviviscere ac pristinam recuperare alacritatem, perinde ac Musci, qui per aestatem, siccii instar pulveris, autumno autem & hieme vigorem recipiunt. Quis nisi vidisset crederet? Interim res haec adeo est certa, ut si quis dubitaverit, videre ipse haec omnia, per microscopia, posset.

### §. VI.

CORALLIA veteres lapidibus adnumerabant, & quia calcarea essent, per modum arboris Dianæ generari credebant, donec Comes *Marsilius* Corallia in mari Mediterraneo expisci inciperet. Inveniebat in his (ut ipsi quidem videbatur) flores vivos, octo petalis, octo staminibus, unoque pistillo, instructos, adeo tamen fugaces, ut in aërem elati statim se contraherent; aquis vero demersi

mersi rursus explicarentur. Hæc ita descripta & delineata non potuit non plantis accensere orbis curiosus, idque adeo videbatur certum, ut *Peysonellus*, Medicus Marsiliensis, cum, anno sequente, coralla ab animalibus construi Reaumurio narraret, ne ulli quidem rem adeo paradoxam persuadere posset, & lateret forte adhuc miraculum, nisi Tremblæus, Polypis intentis, acutissimus ille, Curiosus vereque magnus *Jon Ellis* muscos in fundo maris, quemadmodum Dillenius muscos suos examinaverat terrestres, scrutari microscopiis & in opere incomparabili de Corallicis describere & delineare est adgressus. Videbat hæc ad singula petala seu denticulos florem ostendere, animali alligato similem, quod ad formam Polypi expandetur, impura ex aqua suis tentaculis arriperet orique admoveret, ad contactum sese contraheret, sibi autem relictum, sese expandereret & moveret ut antea: florem autem flaccescentem intumescere tandem in capsulam, quæ demum se aperiens sua dispergeret semina. Hæc vero qui contemplatur, non potest non ad opera Conditoris Optimi admiranda obstupescere. Si res ejusmodi majori mole & in ipso continente terra esset producta, nemo, ut opinor, adeo foret incurius, qui non, ad portentum hoc adspiciendum, longa, etiam cursu, conficeret itinera. Fingas, Lector curiose, arborem, quæ, loco foliorum, florum & gemmarum, pro gemmis singulis caput haberet exiguum avis vel alijs cujusdam animalis, collo adhærens, quod extendi & contrahi posset, atque singula hæc capita, continua actione circumvolitantia, rostro petere infecta, vietumque hoc modo sibi adquirere: quis operæ pretium non duceret ad hæc consideranda suos convertere oculos? Quis adeo stupindus, ut hæc contemtu præterire posset? Talia vero sunt Zoophyta tantum non omnia, quæ sylvarum instar in fundo maris crescunt; tales sunt

Isides, Gorgoniæ, Tubulariæ, Flustra, Sertulariæ & quæ sunt plures. Cum igitur illi, qui Polypos adeo accurate consideraverant, flores viderent polypiformes, perceptu omnino difficillimum fuit, tum Polypos seu **Animalia** a corallis produci, tum etjam Polypos corpus adeo regulare construere posse, quale in Gorgonia Fabello, Alcyonio arboreo, Iside Hippuri aliisque conspicitur. Superfuit igitur, ut crederent hos flores animatos seu Polypinos esse adventitios, Zoophytis adhaerentes, ut ex his nutritur, quemadmodum larvæ Insectorum a suis plantis. Hoc vero controversiæ operosiori, maxime inter viros adcuratissimos, Ellisium & Basterum, agitatæ, dedit occasionem, donec Nob. Dom. *Præses* in *System. Nat.* edit. 10. rem conficeret, quod nempe in his Zoophytis, planta esset vegetabilis, sed flos animalis, unde clarius quoque accessit Zoophytorum conceptus.\* Qui vero hæc intelligere voluerit, animalium compositorum ideam sibi formare debet ex *Tænia*, quæ vermis est plurimorum articulorum, quilibet autem omnia habet requisita vitæ, cum principio medullari, vasibus chylopoieticis, ore &c. adeo ut si singuli divellantur articuli, quilibet tamen vitam constituat propriam; perinde ac si radicem secueris *Tritici reptantis*, singuli articuli singulas dabunt plantas. Medullam, sedem vitæ in aliis plerisque animalibus, Creator intra crustam collocavit osleam, quæ semel in os solidum durata, ulterius extendi nequit; sed in Vermibus, ubi nullum est medullæ obstaculum, ipsa in plura se mul-

ti-

---

\* Sed primum quod sciam de Zoophytis plerisque & audacius banc Theoriam sustinuit Illustr. von Linné in editione decima systematis Naturæ. Expressis Linneanis propositionibus permotus Candidissimus Basterus, qui hoc usque contra Ellisium reliquosque prioris sententiae patronos steterat, alterius evidentiæ vietas dedit manus, & glorioissimo exemplo, repudiata priori sua opinione, verans Theoriam acriter defendere cœpit. Pallas Zoophyt, 29.

tipicat animalia, æque ac in plantis, ubi ramus quilibet nova fit planta, seu vita vegetabilis, quæ etiam separari, terræ committi, radices agere, aliis arboribus inseri & propagari potest. Verbo heic monebo, errasse illos, qui Caput ad finem crassiorem Pæniæ sese obseruatæ visi sunt, cum tamen vix in ullo vermiculo caput invenerit quispiam, multo minus in fine subtiliori, quæ novis quotidie crescit articulis, caput existere poterit. CORALLIA Zoophytis maxime sunt adfinia, finesque inter hæc, non minus quam cetera naturæ regna, in minutissimis, inventu sunt difficillimi; ad terminos autem hos constitutendos, *Madrepora fungites* mente est concipienda. Animalculum hoc est ex suo ovo productum &, ni tallor, annum; substernit hoc sibi basin corallinam & moriens corallum relinquit. Hoc igitur animal infra se exstruit, quemadmodum intra se Conchylium & stirps corallina vegetans dici nequit, ut in Zoophytis, non magis quam Testa conchæ, in animal inclusum excrescit. Si jam animal *Madreporæ* compositum est, & velut *Hydra ramos* emittit: animalculum unumquodque rameum basin suam construit, tum fit *Madrepora* composita. In *Milleporis* idem obtinet; quæ ergo cum Zoophytis nequam sunt confundenda. Superledeo commemorare *Nerilucas marinas*, Nereides tam parvas, ut visum effugiant, adeo tamen copiosas, ut totuni illuminent noctu oceanum & efficiant quod naves, sub atra nocte, ubique, tamquam in igne lucidissimo, natent: fuisse & hæc animalia, in hunc usque diem forte ignota, nisi Microscopia ea detexissent Vianello.

## §. V.

Multa adhuc dicenda forent de mundo vulgi oculis subducto, si ad INSECTA me conferrem contemplanda, quæ plebs tantopere contemnit, & quorum consideratio-

nem senes quoque nonnulli, a quibus meliora sperares, præstigiis & crepundiis adnumerant, cum tamen opera sint sapientissimi Creatoris, qui nihil plane frustra condidit; vidimus nostra ætate, postquam ad hæc animalcula attendere cœptum est, æquilibrium naturæ in regno vegetabili & animali per illa sustineri, adeo ut nullum horum, sine defectu Politæ Naturæ, prorsus extirpari queat. Plura enim hæc, quam animalia maxima, multitudine molem compensante, efficiunt, ut mirabilem eorum œconomiam, metamorphosin aliasque dotes sileam. *Apes, Bombyces, Formicæ, Aphides* singulæ acutissimum virorum exercuerunt industriam. Hinc apertis jam oculis & excitata plurium diligentia, nostro seculo quinquagies plura horum sunt detecta, quam toto ante nos tempore. Ad hoc vero microscopia mirifice profuerunt, sine quibus, *Aphis, Chermes, Coccus, Trips, Podura, Acarus* &c. nunquam satis accurate potuissent examinari. *Phalænam occultellam* habet Dom. Preses adeo exiguum, ut extremum setæ apicem vix æquet, nec crederet sine microscopio quisquam Phalænam esse, nisi moveretur. Minimos in regno vegetabili flores, eorumque STAMINA & PISTILLA, quæ adeo subtilia sunt in plurimis, ut optimam aciem fugiant, armatis conspicimus oculis. Monstrarunt nobis optica hæc instrumenta FIGURAM POLLINIS antherarum, quæ perinde ac figura Seminum, infinite variat, atque haud ita pridem Goettardus curiosissimus vestitum plantarum oculis contemplatus est arte auctis & superficiem earum simplicem in diversa genera, adeo artificiose vidit efformatam, ut in singulis foliis, integræ quasi sylvæ, figuris determinatis, viderentur depictæ.

## CAP. II.

## §. I.

Inclinatio Magnetis ad Polum Borealem & arctium,  
res

res adeo levis, ad Indiam utramque homini pandit viam. Quod Succinum aut Cera obsignatoria trita, minuta quædam frustula chartacea attrahit, tonitrua e nubibus elicere homines docuit. Polypus forficula divisus, ad animalia composita & Zoophyta cognoscenda monstravit viam. In orbem catena naturæ reddit, & articulus quisque ad alterum dicit; una igitur veritas, experimentis patefacta, longam trahit consequariorum & adfinitatum seriem. Una, quæ nemini huc usque patuit, janua naturæ reclusa, maximum ostendit prodigiorum numerum. Talem vero nobis aditum aperuit immortalis Lib. Bar. OTTO MUNCKHAUSEN. Multi nobiscum ad foras adhuc constituti, erest s capillis & stupente animo, tot rimari cupiunt thesauros in hoc conclave reconditos: nemo autem, quod scio, intrare ausus est; sed curiosis tamen hoc inventum, accuratius pensitatum, multum lucis dabit atque illustrationis.

### §. II.

Sunt autores nunnuli, MICROGRAPHI dicti, qui optimis microscopiis, velut lucerna, ad obscuros naturæ angulos penetrare fatererunt. Tales fuere e. g. Joblot, Hofwer, Hooke, Leuwenboek, Grindell, Cuno, Adams, Baker, Needham, Walker, Hill, Ræsel, Ledermüller, Schæffer &c. Quorum plurimi, microscopiorum ope, liquores varios, ut vinum, acetum, infusiones e pipere & aliis, examinaverunt, & diversa ibi observarunt corpora, vario huc illuc natantia motu, nec tamen utrum ejusmodi *Animalcula infusoria* vera fuerint corpora viva, organis instructa, an vero aliud quidpiam salinum, oleosum &c. perspexerunt, neque adeo systemati animalium inferere sunt ausi.

### §. III.

Ut scientiæ veteres scholasticæ nostro potissimum seculo decreverunt, ita practicæ, ut Astronomia, Scien-

tia Naturalis, Mechanica, Medicina, Chymia, artes Manuariæ, majori studio sunt exultæ<sup>(\*)</sup> Nunquam sane scientia Oeconomica, me judice, solidius fuit proposita, quam in libro, quem dedit Anonymus, sub nomine *Der Hausvatter*, qui que duobus voluminibus formæ ostavæ iterum prodiit Hannov. 1766. Inæstimabilis auctor operis est supra laudatus Lib. Bar. Otto *Munckhausen*, Gubernator Provincialis, & e Nolilissimis familiis Hanoverianis oriundus. Scripsit hic vir summus ad Nob. Dom. Præsidem ante decennium, se invenisse, quod *Ustilago Hordei* vivis constat animalculis; nunc denique in opere nuper nominato narrat, non solum farinam nigram in ustilagine Hordei & Tritici mea esse ova; sed etiam similem farinam in Lycoperdis, Agaricis & aliis *Fungis*, immo, ipsam *Mucoris* farinam, nihil aliud quam semina fungorum esse; sed semina hæc tepidæ, per dies aliquot, aquæ commissa, veros germinare in vermiculos, microscopiis perspicue visibiles, tandemque telam contexere exiguam, cui inhæreant immota atque intumescent in Fungos, quibus debeant originem. Quæstio jam oritur, utrum Fungi ad *vegetabilia*, an vero ad *animalia* referri debeant? vel etiam an novum formari debeat regnum naturæ, quod neutrum seu *chaoticum* vocetur? An Polypi huc referendi? An Moleculæ vivæ, *animalia infusoria* dicta, huc trahendæ? atque hoc ad ipsum fermentum seu putredinem prope accedit. Transscribamus ipsa Illustrissimi Auctoris verba & ipsum postea inventum admiremur, quo ipso conclave reseratur peritis mystis maxima ostensurum naturæ miracula. Nos vero hoc inventum tanti æstimamus, ut si non alia exstant summi Viri monumenta, hoc tamen solum immortalem auctori illustrissimo pararet gloriam. Verba Aucto sunt. In

<sup>(\*)</sup> vide *Illustr. Sulmii Characterem seculi presentis in Act Soc. Nidrosiens. Vol. 3.*

USTILAGO sèpè adeo est copiosa, ut tertiam aut quartam partem agri partem occupet, ut omnia grana, loco farinæ albæ, pulvere atro sive impleta. Adcuratior ejus per microscopia examinatio & experimenta plus quam centies instituta me docuerunt, pulvrem hunc meris constare globulis, parvis, pellucidis, nigris intus punctulis, quæ ova sunt insectorum infinite subtilium aut potius vermiculorum. Hæc ova, ubi in humido & certo caloris gradu collocantur, exit aut excluditur animalculum oviforme, quod in extremo rumpitur, & magnam ovorum copiam relinquit.

Ubi Triticum tritatur, plura grana ustilagine infecta conferunt & adhærescent; hæc ova in apice grani tritici barbato atque ita cum ipso semipata terræ committuntur; exclusa animalcula germinibus adrepunt, crescunt cum culmis ex nutrimento granorum terræ commissorum, consumunt medullam adhuc humidam & tandem ova relinquunt.

Ad ustilaginem igitur præcivendam optimè conductit, si Triticum seminatur, ovulis ejusmodi non infectum. Ubi enim nulla sunt ovula, ibi nec animalcula existere aut multiplicari possunt. Si vero purum triticum haberi nequit, ovula saltem, quæ adsunt, corrupti debent atque ad propagationem reddi inepta. Si exploratur pulvis ejusmodi, quod annum jam duravit, globuli intus perspiciuntur exsiccati, adeoque nulla inde metuenda est propagatio, nec ullo alio opus est remedio, si modo triticum recte siccatum atque ab humido conservatum fuit. Si vero recens seminandum est triticum, nihil his animalculis magis est contrarium, quam muria vulgaris, aqua soluta, unde statim disrumpuntur. Humectetur igitur frumentum lixivio ex calce & muria præparato. Hoc modo post viginti annos in meo tritico ustilaginem non vidi, cum tamen vicinis meis tertia interdum pars messis hoc malo perierit. Nec plurimis probabitur œconomis, quod contra ustilaginem, hoc tantum fine arte & simplicissimum præscribo remedium. T. II. p. 329. ubi in hanc rem plura leguntur.

Fungi cum senescunt & imprimis Lycoperda atque omnis mucornigricantem spargunt pulvrem; Hunc si bonis exploramus microscopiis, inveniuntur globuli ex dimidio pellucidi, punctulis nigris intus repleti & substantia polypi antea haud dissimiles. Innisi hunc pulvrem aquæ, atque in loco tepido collocavi, ubi globuli statim intumuerunt, atque in oviformia mobilia commutati sunt animalcula. Hæc animalcula, in aqua hue illuc cursitant; secundo die dum observatur, quod massæ durioris texturæ componuntur seu fungi. Ubi fungi crescere incipiunt, albicantes primum se ostendunt venæ, quæ pro radicibus eorum habentur vulgo: re autem vera non sunt nisi canales, in quibus motitantur polypi, qui paulo post magnum exstruunt ædificium. Si internam

fungorum timetut substantiam, imprimis exsiccati & præparati somitis, adparet eam ex subtilissima tantum constare textura minimorum inter se concretorum et complicatorum canaliculorum, qui polyporum, dum vivent, fuere ineatus. Diutius his immorari locus prohibet: mihi sane indubium videtur, quod omnia *Coralla*, *Fungi*, *Mucores*, *Lichenes*, *Ustilagines*, immo forte omnis *Fermentatio* (S. 634.) a creaturis polypiformibus habeant originem, quas pro animalibus declaratis nondam agnosco, sed quæ tamen ansam mihi dabunt rem ulterius expendendi.

Servetus, Aquapendens & Cæsalpinus circulationem perspiciebant sanguinis; *Harvæus* tamen, qui publicæ candem luci exposuit, tulit honorem. Leuwenhoek triginta annos antea, quam *Tremblaeus* Polypos vidi; huic vero gloria inventionis merito cessit, qui eorundem patefecit indolem. Animalia infusoria viderunt jam diu longe plurimi, ipsum tamen extricare mysterium, ante Lib. Baronem *Munckbausen*, contigit nemini.

#### §. IV.

**USTILAGO**, in *Triticō*, *Hordeo*, *Scorzonera*, *Tragopogone pratensi* & nonnullis aliis, frequens, loco fructificationis, nigrum ostendit pulverem, materia seminali destruta. Novit agricola, spicis ejusmodi per triturationem comminutis, infici nigro hoc pollino grana incorrupta, quæ deinde terræ commissa non nisi spicas proferunt ustilagineas, quæ augmentur donec magna pars frumenti fuerit corrupta. Lavattur igitur a nigro pulvere, purgatur frumentum sationi destinatum, vel etjam cum puriori aliunde quæfito commutatur. Verum igitur hoc est contagium in regno vegetabili. Perhibet Auctor, pulvere hoc aquæ immesso & æstivo calori per aliquot dies exposito, vera ovis excludi animalcula. Experimentum hoc iteratum vidimus apud Nob. Dom. Præf. ubi microscopio Cuffiniano hæc (nudo alioquin oculo invisibilia) ad multas vidi myriades. Animalcula hæc alba videbantur in aqua hyalina, oblonga, anterius obtusiora lu-

den

dentium instar piscium ferri, interdum cum aliquo subsultu, cedere sibi invicem, sed maxime tamen congregari. Post aliquot dierum spatium telam nonnulla ordiri visa sunt ad fundum, cui, si recte observavi, anteriori parti adhaerebant, accedentibus paullatim reliquis pari modo telae innestendis instar mucoris. Quo medio motum hic peragerent vermiculi perspicere non licuit; neque enim adfuit propulsio per caudam, ut in piscibus, nec motus erat serpentinus, ut in Murænis & Gordiis, nec motu ferebantur intestino, ut larvæ Muscarum. Organa tamen nonnulla motus sub parte anteriori adesse habitor. Pedes observare nullos potui, sed neque hoc mirum, cum *Volvox* centies major, in aqua citatissime rotari conspicatur, nullis tamen visis motus organis, nisi ab affini *Beroe* concludere licet, qui *Volvoce* rotatore centies major, pilis movetur brevissimis, in series digestis.

Multis adhuc tenebris hæc genera essent involuta, nisi Illustrissimus *Munckhausius* experimentis suis longius progressus; sumta scilicet nigra farina *Lycoperdi* & aquæ pariter immisla tepidæ, atqua in animalem commutata formam, vidisset hæc animalcula iterum in fungos abire, id est, motum amittere voluntarium, crescere, ubi satis fuerit alimenti humidi, in corpora magnitudine capitis, neque catenulam ostendisset per totum nos sistema fungorum deducentem. FUNGI certe a ceteris vegetabilibus multum differunt, radicésque habent, vix hoc nomine dignas, cum tenue tantum referant tomentum irregulare, quod pauxillum modo humiditatis e terra haurit humida. Nec folia habent, nec analogon fructificationis, ut musci & filices, *Agarici* inter lamellas, etiam habent pulverem seminibus *Lycoperdi* similem, qui pariter in aqua tepida vivificatur. *Roleti* huc accedunt, qui farinaceum quidpiam habent ad poros. In *Peziza lentifera*, quæ in segmentis passim habitat & magnas in cyathis fo-

vet lentes, modus non concipi potuit, quo ponderosa ejus semina a loco ad locum transferantur: sed solvi forte per dete~~as~~as has affinitates & propagationes admirandas hoc ænigma poterit. Cur unice fere & potissimum *autumno* crescant fungi mirati sunt Physici, jam vero ratio patet, quia semina horum humidum requirunt tepidum ad ova excludenda; verno atque æstivo tempore hoc difficilius procedit, ob ventum humores exsiccantem; tum enim pluvia cito obsorbitur a terra & exhalatur in superficie: autumno autem, aëre paululum frigescente, terra, quamvis caloris nonnihil ab æstate retineat, tamen post pluvias diutius manet humida, atque adeo seminibus fovendis aptior. Atque hinc etjam fit, ut autumni humidiiores majorem, quam sicciores, fungorum habeant preventum. *Mucorem* etjam hic refert illustris Author, tota sua natura fungis tantopere adfinem; surgit hic in stipitem, terminatum capitulo vel capitulis, quæ rumpuntur aut fatiscunt in pulverem seminalem, qui sponte seritur, & corpus, cui adhæret, destruit. Videmus enim minimum mucoris punctum in Citro sese multiplicare, totumque brevi Citrum consumere. Quid igitur existimandum de fungis ædificiorum, *Mucoris septici* vulgo unctuosi, qui tignos durissimos brevi tempore in pulverem redigere valent? Erit hic certe campus ad ingenia, donec omnia hæc explorata fuerint, experimentis exercenda patentissimus. *Erysiphe*, quæ plantis innascitur *Ros*, ut dici solet, *melleus*, quo folia maculantur *Aceris*, *Humuli*, *Galeopsis*, *Lithospermi tinctorii* &c. maxime in loco humidiiori, & qui cum rore descendere videtur, quia supraemi occupeat foliorum latera, dictis sine dubio debetur caussis. Quomodo autem in aërem ascendat, an, velut ceteri humores, evaporet e terra ob subtilitatem incomprehensibilem, aliis forte decebit dies.

## §. V.

Deducet quoque hoc argumentum medicos ad causam febrium exanthematicarum & contagiosarum, quam antea cum materia animata tantam habere analogiam perspexerunt, quatenus frigore & calore, ambrofiasis & foetidis, dulcibus & amaris, quin & mercurialibus repelluntur aut alliciuntur. Qui perpendit unicam farinæ ustilaginis particulam, per omnes ejusdem radicis triticeæ aut hordaceæ spicas multiplicari, analogiam, haud minimam inveniet. Pustulas Variolarum multi sunt scrutati, an vivum quidpiam animalculum contineant, sed frustra. Qui vidit exclusos vermiculos ustilaginis in aqua tepida, adeo esse subtile, ut ne acutissimis quidem oculis cernantur, subtiliora heic requiri experimenta, & pus aqua tepida solvendum & optimo deinde microscopio examinandum fatebitur. Saltem Siphiliticus quispiam aut gonorrhoeus curiosus in destillante sua genitura virosa experimentis expiscari deberet, an & qualia contineat animalcula. Detexit ante hæc Leuvenhoekius vermiculos seminales in omni genitura prolifera, quod experimentum, jam aliis quasi oculis est instituendum; Vermiculos hos abesse aut mortuos inveniri dixit apud siphilicos, quod tamen dubitatur; hos etiam in homines converti, aut in ovo concipiente carinam Malpighii constituere adfirmat, quæ res tamen nondum est ad liquidum perducta. Adesse haec corpuscula seminalia in genitura nemo negat, an vero vermiculi sint ejusdem indolis ac vermiculi fungorum, experimentis est decidendum. Quod pollini in antheris florrum analoga sint animalcula seminalia dubitari nequit; pollen autem antherarum non intrare stigma aut stylum, palpabile est, maxime in Mirabili, ubi pollen stylo ferre majus est, & stigmati superinjectum manet. In plurimis videmus hoc pollen rumpi a contactu humoris ge-

nitalis stigmatis & fovillam emittere, quæ a stylo absorpta descendat ad semina. Needhamus microscopiorum ope tinturam hanc, seu impalpabile subtilissimum, quod intra polleni continetur, ruptura pollinis efflari velut ex embolo, & subtilissimis constare quasi spiralibus. An hæc cum antea dictis sint analoga tempus dabit.

## §. VI.

Vidimus per æstatem, idem quod Reaumurius, exiguae quasi *nubeculas æthereas* unius vel duarum ulnarum latitudine in ære suspensas hærere, duas vel tres ulnas supra terram, inter horam saepius diei decimam & undecimam, in primis mense florescentiæ, quando solis est splendor maximus, & videre nobis vissi sumus particulas, quibus nebula hæc constet, instar examinis apum commoveri. Si hæc animalcula sint, ut non sine ratione suspicamur, cum antea nominatis habent procul dubio indolem communem. *Angvillas* subtilissimas, quæ in omni aceto, per microscopia observantur, pro larvis muscae, infinitæ parvæ, habent nonnulli: quod locum non inveniet, si verum est, quod Ledermüller narrat, nempe has forfice dissectas vivis impletas inveniri foetibus, qui sic in humido excurrant & impigre moveantur. Præterea hæc ipsæ, quæ omni fere glutini insunt, eam habent indolem, ut, si per totum annum exsiccatur gluten, eodem tamen humectato reviviscant; quod larvae muscae cuiquam non competere, sed ad novam hanc potius familiam ducere videtur.

## §. VII.

**CHAOS Protheus**, quem detexit Rœsel & punto consistit mucoso nudis oculis invisibili, determinata destituto figura, sed in omnes regulares & irregulares figuræ, angulos & ramos quovis momento commutabili

li (\*) ad mundum quoque hunc invisibilem pertinebit. Inter Grana TRITICEA inveniuntur saepe nonnulla imperfecta, dimidiato grano fere similia; haec pluribus licet annis siccata, corculum, aquis injelta, emittunt vermiculo similem; An vitam habeat animatam nec ne, dicere non ausim; eritque hoc obiectum curiosis olim dignissimum.

Hæc vero Animalia aliquando naturæ scrutatores ad principium animale in animalibus deducent, quia heic conspici videntur primæ moleculæ animatæ. Cum ANIMALIA INFUSORIA eorumque species adcuratius jam consideratae fuerint, infinitæ inde duci videntur conclusiones, quæ adhuc crassissimis sepultæ jacent tenebris. Hinc ad substantiam *plantarum MEDULLAREM* deducimur examinandam, utrum illa sit animata, ut animalium, quamvis nervos non habeat, & motum voluntarium manifestum, intra rigidam substantiam corticalem incarcerata, exferere nequeat. Interim ORDO FUNGORUM adeo jam videtur esse ab ordine vegetabilium distinctus, ac ordo Zoophytorum, vel in confinio saltem relinquuntur inter regnum animale & vegetabile, adeo ut nemo adhuc geodætes naturæ decidere potuerit, cui horum regnorum haec provincia potiori jure sit attribuenda. Si enim semina, in vivos abeunt fœtus animales, hi postea in vegetabiles transformantur fungos, concipi fere possunt velut in secta Progallica Reaumurii, aut Coccus Ilicis cocciferæ, quæ primum sunt in secta alacriter cursitantia, sed fœmina statim post copulam rostro, in pectore sito, cortici sese adnectit, vivit immobilis & rostro tantum per corticem exsugit nutrimentum, intumescit quotidie in magnitudinem pisí, baccæ rubræ adsimilata (unde etjam a veteribus pro vera bacca

---

(\*) Ref. inf. 3. t. 101. f. A. T. Ledermüll. micr. t. 88. f. 48.

est habita (ex qua Ilex baccifera dicta), intus meris impleta ovulis, quæ intra matrem excluduntur, eamque totam consumunt.

### §. VIII.

Credebatur antiquitus *Generatio æquivoca*, ita quidem ut minima insecta & larvæ ex corruptione & putredine generari putarentur. Percipi enim haud facile potuit, quomodo caseum vel cadavera vermiculi intrare queant, ut difficulter Harvæus perspicacioribus persuadere poterat, omne vivum esse ex ovo, nec vulgo haec res etiamnum satis persuadetur. Ubi primum observata est insectorum *metamorphosis* admiranda, qua Larva crassior, multis pedibus, repens, vorax, in Papilionem alacrem, volitantem, sobrium, priori adeo dissimilem, ut dies nocti, commutatur, videbatur hæc ipsis figuris Ovidianis magis admiranda. Cognita vero insectorum *metamorphosi*, observabatur *fructificatio* & flos plantarum nihil esse nisi meram *metamorphosin*: folia Cardui in florem Echinopsis seu Gundeliæ admirabilem commutari; folia simplicia in pulcherrimam Amaryllidem, Gloriosam, Leonorum; ut viderentur ipsa naturæ adyta penetrati detegendo *prolepsin* transformata per antiprægnationem. Cum primum observabantur Gorgonæ, Sertulariæ & alia Zoophyta cum Polypis, nihil certi statui potuit, donec ad nimadverterent hæc tamquam vegetabilia, per *metamorphosin* abire in animalia, quemadmodum plantæ in flores. Atque ultimum hoc inventum admirationem curiosorum vix satiavit, antequam alijs jam naturæ actus luditur, ubi inversa ratione *animalium metamorphosis in vegetabilia fit*. Si haec igitur, ut credit Illustrissimus auctor, ad putredinem & fermentationem usque ducunt, fatendum est, res interea stupendas occurrere in minimis moleculis vivis. Annorum autem non paucorum labor erit fin-

go-

g orum omnium semina viva eorumque modum transformationis, nec non generationis & vegetationis leges investigare. Cum videmus vermiculos Fungorum seminales adeo esse subtile, ut in gutta aquæ milleni existere queant, & tamen oculis non observari, in aqua æque ac antea pura & pellucida, facile concipimus, in ipso *mucore*, ubi tota planta sine microscopio vix conspicitur, semina esse ex proportione infinite subtiliora. Minima igitur animalia adeo sunt subtilia, ut cogitatione vix concipi queant. Mirum igitur non est, quod hæc, quæ centies pulvillum minimum, qui in solis radiis obvolitat, subtilitate vincunt, volitare in aëre et ferri ubique possint ac se ubique disseminare. Cum etjam observamus, fungos & mucorum tantum in locis humidis crescere, mucoremque carnibus, panibus & cibariis quibusque humidis vel humido expositis aëri adhærere: in tranquillo tantum & humido istos vigere patet. Pauxillum fungi in ædificiis (*Mucoris septici*), adeo celeriter accrescit, ut oculis fere cerni incrementum possit, & in pulverem seminalem infinite copiosum totus quantus resolutur, unde facile concluditur, nullum vivens copiosius propagari & multiplicari, quam subtilissima hæc animalcula, neque igitur mirum, quod ubique seri atque adesse possunt. Ex incredibili vi septica mucoris & fungi concipimus horum seminalia animalcula obvia quævis humida corrodere, quemadmodum Thermes in indiis; vires enim unitæ tortius agunt.

Hinc infinite multa credimus esse animalia nobis incognita, ut cum Syrachide merito dicamus: *pauca hæc videmus operum divinorum, multa sunt abscondita majora minorave his.* Nonne igitur conjicere & inquirere debemus, an morbi, qui autumnali tempore, tempestate ut plurimum humida, tranquilla & nebulosa, grassantur, originem debeant animalculis infinite parvis, his aut

proximis, quæ aëre ejusmodi continantur, e. g. febres intermitentes, exacerbantes, &c. Sic Hæmitritea in inferioribus & humidis locis est frequentior; et omnes hæc febres vere & æstate calidiori transeunt in Tertianas, sed autumno saepè producant exanthemata seu petechias a minimis forte ejusmodi animalculis, sed copiosioribus oriundas. Graßantur vero hæc mala, si non epidemice, tamen endemice, apud omnes fere in aëre ejusmodi fungis & mucoribus apto viventes, præprimis in infimis concamerationibus habitantes & referri huc forte poterit Phthisis, & morbi complures. Prædium, in quo observabat Söderberg (\*) vix ultra decennium ullos vivere habitatores, sed omnes eo habitatum concedentes morbis statim coripi, domos habuit loco depresso & humido sitas, quarum parietes inferne fungis, mucore & muscis obducebantur. In locis igitur habitare altis, siccis, perflatis omni ævo optimum usum est ac saluberrimum, adeo ut febres intermitentes, non nullis locis vix inveniantur. Hinc minima animalia, majorem forte edunt stragem, quam maxima, immo plures fortassis interimunt quam bella omnia. Ego vero conjectando ulterius progredi non sustineo. Dies omnio venturus hæc & longe plura, quam conjectare possumus, in lucem protrahet clarissimam. Cur

(\*) Söderberg in Actis Holmiensibus 1750 p. 298 memorabilem admodum profert observationem de habitatione simplicissima unius rustici in Skalltorp, parœcia Eds in Dalia, ubi omnes homines pallidi, Asthmatici, Hæctici, ut inde intra XVI annos XXX mortui; plerique phthisici, nec ullus sanus repertus, ideoque nec famuli obtinerentur, cum brevi certius ægrotarent, plerique succumberent. Observabat domam sitam in convalli inter monticulos, cuius fundo petra substrata erat, ne aqua descenderet; hic deinde rectum erat argilla renaci, e qua aquæ detentæ continuo exhalabant mephiten fætentem. Inde faetor suffocans in ædibus; inde parietum fundamenta & pavimenta obiecta & corrupta erant & infecta Muscis, Mucoribus, Agaricis, Lycoperdis. Nullus itaque, aptior locus pro vermis chaoticis fungorum corporum.

## SCHOLIA.

Cur *Fungi* autumno proveniant.

Cur *Mucor septicus* in quibusdam locis destruat Domos lignreas.

Cur Autumno *Morbi Endemii* frequentiores.

Cur Morbis magis expositi, qui *infimas domus concamerationes* inhabitant.

Cur *Querqueræ & Hæmitriteæ* frequentiores vere & autumno, & peiores in infima concameratione.

Cur Habitationes in locis elevatis perflatis magis salubres.

Anne Contagium etiam fit in *Plantis* & quomodo.

Anne Contagium eodem modo existat in Animalibus?

Anne *Fungi* potius ad *Regnum animale*, quam ad *Vegabile* pertineant.

Anne *Fungorum & Zoophytorum* metamorphosis plane contrario modo declaretur.

Anne plurima Animalia etiamnum lateant tam *parva*, ut oculos fugiant.

Anne ejusmodi Animalculis debeantur *morbi Contagiosi & exanthematici* plerique.

Anne minima ista animalcula, *chaotica* dicta, mere medullaria, corporeque organico fere destituta sint.

S. D. G.



